

Urriaren 11n  
**URTEAN ZEHARREKO 28. IGANDEA**

**Agurra**

Gauza guztien egile eta dohain guztien emaile den Jauna izan bedi zuekin.

**Sarrerako oharpena**

Jainkoak gizon-emakume guztiei egiten dien deia, gonbita, entzunaraziko digu Jesusek gaurko ebanjelio zatian. De horri erantzun nahirik jarraitzen diogu Jesusi, eta dei horrixe erantzunez etorri gara Jaunaren mahai ingurura.

Pozez etorri gara, salbatzen gaituen Jauna hemen, geurekin, dugulako.

**Damu-otoitza**

Eukaristi ospakizun honen hasieran, eska diezaiogun Jainkoari bihotz-berritzearen grazia; horrela baketzea lortuko dugu eta elkartuago egongo gara Jainkoarekin eta geure senideekin.

—Jesus Jauna, Pedro damutuari barkamena eskaini zeniona: erruki, Jauna.

—Jesus Jauna, lapur onari paradisua agindu zeniona: Kristo, erruki.

—Jesus Jauna, bekatuen barkamenerako Apostoluei Espiritu Santua eman zeniena: erruki, Jauna.

Erruki dakigula Jainko guztiz ahaltsua, eta, gure bekatuak barkaturik, eraman gaitzala betiko bizira.

## Otoitza

**Jauna, izan dezagula beti zure grazia,  
 bai aldez aurretik, bai bidelagun;  
 Zuk eutsirik, on egiteko prest egon gaitezen beti.  
 Zure Seme Jesu Kristo gure Jaunaren bitartez,  
 Zurekin eta Espiritu Santurekin batean  
 Jainko eta errege bizi baita gizaldi eta gizaldietan.**

## Hitzaren liturgiari oharpena

Gizaki guztientzat da Jainkoaren gonbidapena. Jainkoaren ezagupenean aurrera egin eta berarekin bat eginda bizitzeko deia egiten digu Isaiasek.

## Lehenengo irakurgaia (Is 25, 6-10a)

Isaias profetaren liburutik

Egun hartan, jai otordu bat emango die diren guztien Jaunak mendi honetan herri guztiei, jaki guriekin, edari bikainekin, haragi gizen mamitsuekin eta ardo zahar garbiekin. Mendi honetan kenduko du, herri guztien gainean edatua dagoen estalkia, jende guztiak estaltzen dituen oihala. Betiko hondatuko du heriotza; xukatuko ditu Jaunak aurpegi guztietako negar-malkoak, eta lur osotik aldenduko du bere herriaren lotsakizuna —hala dio Jaunak—. Eta egun hartan esango da: «Hara gure Jainkoa; Hau da guk salbatzaile itxaron genuen Jauna. Poztu gaitezen eta alaitu salbatu gaituelako. Jaunaren eskua mendi honetan kokatuko da».

## Erantzun-salmoa (Sal 22, 1-3. 4. 5. 6)



Jau - na dut ar- tzain, ez naiz e-ze - ren be - ha-rre - an.



Jauna dut artzain, ez naiz ezeren beharrean:  
 larre gurietan etzanarazten nau.  
 Atsedenezko iturrira narama, '  
 eta berpizten dit barrena.  
 Banarama bidezidor zuzenetatik ' bere izenagatik. R/.

Ibar ilunetatik banabil ere, ez nago gaitz-beldur,  
 Zu nirekin baitzaude:  
 zure zigorra eta makila,  
 hauek dira nirere poza. R/.

Atontzen didazu mahaia,  
 etsaiak dauzkadala begira;  
 olioz gantzutu didazu burua,  
 gainezka dago nire edontzia. R/.

Zoriona eta grazia ditut aldean,  
 neure bizi guztiko egunetan;  
 eta Jaunaren etxean naiz biziko  
 luzaroen luzaro. R/.

### **Bigarren irakurgaia** (*Flp* 4, 12-14. 19-20)

San Paulo Apostoluak Filipotarrei

Senideok: Badakit eskasian bizitzen; badakit ugarian bizitzen; denetan eta denetara jarria nago: bai gosera, bai asera, ugaritasunera eta eskasiara. Denetarako badut indar, indartzen nauen Harengan. Nolanahi ere, ondo egin duzue, nire estualdietan lagunduz. Ordainetan, nire Jaungoikoak oparo beteko du zuen eskasia guztia, bere aberastasunaren arabera Kristo Jesusengan. Jaungoiko gure Aitari aintza gizaldi eta gizaldietan. Amen.

**Aleluia** (Ik. Ef 1, 17-18)

Jesu Kristo gure Jaunaren **aitak**  
 argi bitza gure bihotzeko **begiak**,  
 horrela jakin de**zagun**  
 nolakoa den Haren deiaren **itxaropena**. R/.

**Ebanjelioa** (Mt 22, 1-14)**Homiliarako argibideak**

*Erantzukizuna nondik?*

Askotan aipatu izan da harako kontakizun hura: Kazetari bat edo hurbildu omen zen, eraikin berri bat egiteko harriak lantzen ari ziren langileengana, eta aurkitu zuen lehenengoari galdetu omen zion: «Zertan ari zara?». Erantzuna garratza: «Zertan ariko naiz ba, hementxe nezka-nazka eginda, eguzkiaren beroa eta lanaren astuna eraman ezinik; denak pikutara botako nituzke».

Kazetaria aurreraxeago doa eta bigarren bati galdetzen dio: «Zu zertan ari zara?». «Agindu didatena egiten; harria lantzeko esan didate eta zer erremedio, esana bete behar!». Aurreraxeago beste bat lan berean hura ere: «Zu zertan ari zara?». «Zertan ari naizen? Katedral eder bat egiten! Zoragarria da Katedral bat egitea!».

Hirurek lan bera ari zuten, baina lanaren erantzukizuna ez zaie iturri beretik sortzen, hori bistakoa da. Batek lan gizakonstrako eta ilun

ikusten duena, besteari erregalu eta dohaina iruditzen zaio. Gaur askotan aipatzen da erantzukizunaren arazo hau, arazo izatera iritsi baita. Ez omen gara ari gure gazteak erantzukizunean hezitzen, erantzukizunaren eskasia handia sumatzen omen da. Izan daiteke egia. Nik, hala ere, emaitzari baino gehiago erantzukizunaren iturriari begiratu nahi nioke.

Erantzukizuna nondik eta nola? Garai batean, garai luze batean, beldurra izan zen erantzukizunaren eragile. Agintzen zuenak agintzen zuen, eta hark esandakoa egin beharra zegoen, bestela nolabaiteko mehatxua baikeneukan geure buru gainean. Autoritateak pisu handia zeukan, eta esandakoa egin beharra zegoen. Kristau giroan ere, infernua zela edo bekatuaren erru astuna zela, beldurrak lan handiak egiten zituen. Eta hura ez zen ona. Beldurra ezin daiteke izan erantzukizunaren arrazoia. Ezta agintea aginteagatik ere.

Orain beldurra joan da, eta erantzukizuna nola sortu ez omen dakigu. Jendeak nahi duena egiten omen du. Askatasuna askakeria bihurtu zaigu nonbait, eta ez dakigu nola bideratu auzi hau. Berriz beldurraren ikuspuntura itzultzea tristea eta gizakontrakoa izango litzateke. Gaur egun ez luke, gainera, inolako eraginik izango. Beldurrak ibilbide motza du.

Dohainaren kontzientzia izan daiteke erantzukizunaren iturri. Eta horixe lortu nahi du Jesusek. Eztei-otordu batez mintzo zaigu. Maitasunaren mahaira deitu gaitu. Dei hori gonbidapena delako, doan egindako deia delako, ezin daiteke zapuztu eta bazterrera utzi. Jainkoak esker txarraren mina du minik handiena. Jainkoak ez du inor beldurtu nahi; bere eskaintzaren ederra onartzea nahi du. Eta horiexek biltzen ditu beregana, gonbidapena onartzen diotenak. Maitasuna handia izan delako, maitasunaren deia ere larria izaten da.

Erantzukizun horren aurrean beste erantzukizunak gailentzen zaizkigu askotan: seme-alabak, lana, konpromkisoak, politika, kulturgintza, adiskideak, bidaiak... Horiek denak aurretik eta gaintik jartzen zaizkigunean gauza bat erakusten dugu: Jainkoaren maitasunak ez gaituela erantzukizuna sortzeraino barrutik hartu. Eta beste horietara ematen dugu bihotza. Baldin eta Jainkoaren maitasuna izango banu barruko betetasun, Jainkoaren maitasuna benetakoa izango banu barruan, orduan beste guztia maitasun horren inguruan antolatuko litzaidake.

Maitasunaren eta dohainaren kontzientzia handia behar da, dena Jainkoaren erreinuaren inguruan tolestatzeko. Eta horixe dugu gaurko gizarteari egin diezaiokegun ekarpenik ederrenetakoa: maitasunaren errealitatea azaldu era guztietara, Jainkoaren maitasun hori benetakoa dela sinets dezan. Eta, izan ziur, maitasun benetako horrek sortuko luke benetako erantzukizun-jarrera. Maitasunak adina erantzukizun ez baitu beste ezerk sortzen eta lortzen. Noski, lana luzea eta sakona da, ez da erraz egitekoa. Saiakera ez ezik, esperientziaren lana ere bada. Maitasuna ez baita hitzez erakusten, bizieraz baizik. Erantzukizunaren auzia!

### **Jainkoaren herriaren otoitza**

Jaunarenganako uste onez beterik egigun otoitz:

- Kristau izateagatik sufritzen dutenek izan dezatela Ebanjelioarekin leial izatearen pozak ematen duen barne-bakea.
- Nazioetako arduradunek izan dezatela egiazaletasuna eta justizia, denon ondasunak zaindu eta banatzerakoan.
- Lurra landuz bizi direnek izan dezatela bere lanaren fruituak egoki jaso eta banatzeko bidea.

—Igandea ospatzera biltzen garenok izan dezagula geroaren gogoz, oraina Jainkoarekin bat eginda bizitzeko grazia.

Jainko Jauna, zeure Semearen otordura gonbidatzen dituzu gizaki guztiak; entzun gure erreguak eta emaguzu Zure Espirituaren jakinduria, Zure deiaren itxaropena ezagutu dezagun eta guretzat prestaturik duzun erreinuko mahaiaren aintza goza dezagun. Jesu Kristo gure Jaunaren bitartez.

### **Jaunartze ondorengo otoitza**

**Gutziz ahaltso zarenez, Jauna, apalik eskatzen dizugu,  
zure Semearen Gorputz eta Odol santuez janaritu gaituzunok  
parte izan dezagula jainkozko zure izatean.  
Jesu Kristo gure Jaunaren bitartez.**